

**Ilageeqarneq pillugu Inatsisartut inatsisaata
allanngortinneqarneranik Inatsisartut inatsisaat
(Ilageeqarnermi atorfinitsitsisarneq, uppersarsaatit
akiliuteqartarneq palasit ajoqillu upperisarsiornerup
tungaaticut pissuteqartumik ilagiinni suliaassanik
suliaqarnissanut pisussaajunnaarsitaasarnertat,
aalajangiinernik allaffissornermi ingerlatsisunut
qulliunerusunut suliaassanngortitseqqittarnernik
killiliineq kiisalu allaffissornermi pinngitsoorani
malittarisassiortarnissaq pillugu aalajangersakkat)**

§ 1

Ilageeqarneq pillugu Inatsisartut inatsisaanni nr. 9-mi, 19. maj 2010-meersumi imaattunik
allannguuteqartitsisoqassaaq:

1. § 4, imm. 1 imatut oqaasertalerneqassaaq:

"Naalakkersuisut Biskoppimik isumaqatigiinniuteqareennikkut naalagiartitsisarnermi ilagiinnilu
iliuuserisat pillugit aalajangersakkanik aalajangersaasinnaapput."

2. § 4, imm. 2-mi imatut oqaasertalerneqassaaq

"Imm 2. liturginik, ritualinik, tussiutinik tussiutinullu ilassutinik Biskoppin inassuteqaateqareerneratigut
atuutilersitsisarneq pillugu Naalakkersuisut aalajangersakkanik aalajangersaasinnaapput."

3. § 7. imm. 3-tut ilanngunneqassaaq:

"§ 3. Naalakkersuisut Biskoppimik atorfinitsitsillutillu soraarsitsisassapput."

4. § 9, imm. 1 imatut oqaasertalerneqassaaq:

"Ilagiit sinniisaasa inassuteqaateqareernerisigut provsteqarfiup ingerlatsineranut ukiumoortumik
aningaasanut missingersuusiaq provstip suliarissavaa, taamaattoq tak. § 6, aalajangersakkallu
Naalakkersuisunit Biskoppi isumaqatiginiareerlugu aalajangersarneqartut malillugit aningaasanut
atugassiissutitut akisussaalluni."

5. § 14-imi imm. 2-mi aamma **imm. 3-mi** imaattut ilanngunneqassapput:

"Imm. 2. Palasi imaluunniit ajoqi upperisarsiornerup tungaaticut pissuteqartumik ilagiinni suliaassanik
suliaqarnissanut suliaasanullu peqataanissamut pisussaajunnaarsinneqarsinnaavoq."

"Imm. 3. Palasip ajoqilluunniit pineqartup suliaq provstimut saqqummiutissavaa. Provstip suliaq

biskoppimut saqqummiutissavaa kingornatigullu biskoppip aalajangissavaa palasi ajoqiluunniit suliami tassani suliaqarnissamik pisussaajunnaarsinneqarsinnaanersoq.“

6. § 15, imm. 4 imatut oqaasertalerneqassaaq:

“Imm. 4. Atuagarsuarnik allattuisarneq pillugu Naalakkersuisut Biskopimut isumaqatigiinniareernikkut aalajangersakkanik aalajangersaasinnaapput.”

7. § 16, imm. 4 imatut oqaasertalerneqassaaq:

“Imm. 4. Provsti provsteqarfimmi tamarmiusumi taasisinnaatitaanani ilagiit sinniisaasa ataatsimiinneranni peqataasinnaatitaavoq.”

8. § 18, imm. 4, oqaaseqatigiit 2. imatut oqaasertalerneqassaaq:

“Allattaaviup akuerineqartup assiliner provstimut biskoppimullu paasisutissatut nassiunneqassaaq.”

9. § 20, imm. 1 imatut oqaasertalerneqassaaq:

“Palasi atuagarsuarnik allattuisoq palaseqarfimmi oqaluffiit illuutaat toqusullu inaat taakkununga ilanngullugit Naalakkersuisunit aalajangersarneqartut malillugit nakkutigissavaat. Nakkutilliineq najukkami ilagiit sinniisaat suleqatigalugit pissaaq. Palasi atuagarsuarnik allattuisoq palaseqarfimmi nakkutilliineq pillugu ukiumoortumik nalunaarusiamik provstimut nassiussissaaq. Illuutit isumannaatsumik aserfallatsaalinissaat provstip isumagissavai.”

10. § 21, imm. 1 imatut oqaasertalerneqassaaq:

“Ilagiit sinniisaasa oqaluffinnik toqusullu inaannik sananissamut, aaqqissornissaannut, aserfallatsaaliornissaannut pinnersarnissaannullu kiisalu init naalagiartarfittut atorineqartut (atuarfittut naalagiartarfittut) aaqqissornissaannut pinnersarnissaannullu siunnersuutit palasimut atuagarsuarnik allattuisuusumut saqqummiutissavaat.”

11. § 26-p kingorna kapitalit nutaat ilanngunneqassapput:

“Kapitali 7

Atorfinitsitsinermut sulilernissamullu piumasaqaatit

§ 26a. Kalaallit Nunaanni ilagiinni palasit atorfinni atorfinissinnaapput:

1) inuit upperisarsiornerup tungaatigut Ilisimatusarfimmi bacheloritut naammassinnissimasut imaluunniit danskit universitetianni upperisarsiornerup tungaatigut kandidatitut soraarummeersimasut kingornatigullu pastoralseminariumimi ilinniarnermik ingerlatsisimasut,

2) inuit ilisimasat tungaasigut ilinniartitsisunngorniarnermut nallersuussinnaasumik ilinniarsimasut, tamatumalu saniatigut kristumiussutsimut ilisimatusarnermi malittarisassat Naalakkersuisunit aalajangersarneqartut malillugit ingerlaqqiffiusumik ilinniarsimasut, aammalu

3) inuit ilagiinni danskit naalagaaffiata tapersersugaanni palasiusimasut imaluunniit palasiunissamut piumasaqaatinik naammassinnissimasut.

Imm. 2. Kalaallit Nunaanni ilagiinni palasit ilagiinni danskit naalagaaffiata tapersersugaanni ilaasortaassapput.

Imm. 3. Kalaallit Nunaanni ilagiinni palasit malittarisassat Naalakkersuisunit suliarineqartut naapertorlugit kalaallit oqaasiinik ilisimasaqassapput.

Imm. 4. Palasit ilinniarnernannut ilinniaqqinnerannullu ilagiit ilinniartitsisunngorniarnermut peqataasimanissaaq palasit atorfinitsitsinissamut piumasaqaataanissaa Naalakkersuisut

aalajangersinnaavaat. Tamanna pillugu malittarisassanik erseqqinnerusunik Naalakkersuisut aalajangersaasinnaapput, tassunga ilaalluni pikkorissarnermi akissarsiaqarneq.

§ 26b. Naalakkersuisut biskoppip inassuteqareerneratigut inuk § 26a, imm. 1-imi piumasaqaatinik naammassinnissimanngitsoq palasit atorfimmi atorfnitsinneqarnissaannut immikkut ittumik akuerisinnaavaat.

§ 26c. Naalakkersuisut biskoppip inassuteqareerneratigut ilinniarnernup tungaatigut piumasaqaatinik § 26a, imm. 1, nr. 1 aamma nr. 2-mi taaneqartunut taarsiullugu aalajangersakkanik aalajangersaasinnaapput inunnik piumasaqaatinik taakkuninnga naammassinnissinnaasunik amigaateqartoqassappat.

§ 26d. Kinaluunniit Kalaallit Nunaanni ilagiinni palasit atorfnitsinneqartoq biskoppimit soraarummeersinneqarsimassaaq, ivertinneqarsimassaaq, ilagiinnut palasit neriorsuisimassaaq biskoppillu uppernarsaasigaanik palasit sulisinnaanngortitaasimassalluni.

Palasit atorfnitsitsinermi suleriaatsit

§ 26e. § 26f malillugu oqaaseqaammik tunniussisoqarnissaa pitinnagu sapinngisamik biskoppip imaluunniit provstip biskoppip piginnaatitaata aamma ilagiit sinniisaanni ilaasortat qinikkat akornanni qinnuteqaatinik ilisimatitsiffusumik ataatsimiittoqassaaq. Ataatsimiinnissaq qinnuteqarfissamut piffissaliussap kinguninnguatigut biskoppimit aalajangerneqassaaq biskoppimillu provstimilluunniit biskoppimit piginnaatinneqartumit aqunneqassalluni. Ilagiit sinniisaannit ataatsimit arlalinnilluunniit qinnuiginnittoqareerneratigut imaluunniit tamanna biskoppimit kissaatigineqarpat biskoppip ilagiillu sinniisaasa akornanni ilisimatitsiffusumik allamik ataatsimiittoqassaaq.

Imm. 2. Ilisimatitsiffusumik ataatsimiinnernut imm. 1-imi taaneqartumut piffissaliussanut periusissanullu malittarisassanik Naalakkersuisut aalajangersaasinnaapput.

§ 26f. Palaseqarfimmi palasit atorfinnut inuttaqanngitsunut atorfnitsitsinissaq pillugu palaseqarfimmi ilagiit sinniisaannit qinikkat oqaaseqaammik tunniussaqaassapput. Sapinngisamik biskoppip ilisimatitsiffusumik ataatsimiittitsinerata kinguninngua oqaaseqaateqarfusumik ataatsimiittoqassaaq. Oqaaseqaat taasiffissatut pingaarnersiorlugu tunniunneqassaaq, ilagiillu sinniisaat ajornanngippat peqataasut 3-t taaneqarsinnaasuni piukkunneqartunik taaneqarnerpaanik nalunaaruteqassallutik.

Imm. 2. Biskoppi sapinngisamik qinnuteqartunik pingasunik pingaarnersiorlugit tulleriiaarneqartunik inassuteqassaaq. Biskoppip qinnuteqaatit ilagiit sinniisaasa oqaaseqaataannik ilallugit kiisalu nammeneq inassuteqaanni ilanngullugu Naalakkersuisunut nassutissavai.

§ 26g. Palasit atorfimmi kina atorfnitsinneqassanersoq Naalakkersuisut aalajangissavaat, tak. §§ 26e aamma 26f. Qinnuteqartoq biskoppip inassuteqaataanut ilanngunneqanngitsoq atorfnitsinneqarsinnaanngilaq biskoppi oqaaseqaateqarsimatinnagu.

§ 26h. Qinnuteqartoq ilagiit sinniisaasa oqaaseqaataannut ilanngunneqarsimanngitsoq Naalakkersuisut atorfnitsissinnaanngilaat. Qinnuteqartoq ilisimatitsiffusumik ataatsimiinnermi siullermik taasisoqarnerani tamanit qinerneqartoq peqataanillu biskoppip inassuteqaataani ersertoq atorfimmi atorfnitsinneqassaaq.

Imm. 2. Immikkut ittumik pissutissaqartoqarpat nutaamik inuttassarsiuisoqarnissaa nutaamillu inassuteqartoqarnissaa Naalakkersuisut aalajangersinnaavaat.

§ 26i. Suliffeqarfinnut inunnulluunniit ilagiit sinniisaannik pilersitsiffusimanngitsunut sullissinissaq siunertaralugu palasit atorfii tamakkiisumik ilaannakuusumilluunniit pilersinneqartut

inuttalernissaanni periusissanut malittarisassanik Naalakkersuisut aalajangersaasinnaapput. Tamanna aamma atuuppoq ukioq ataaseq angullugu sivikinnerusumik atorfinitsitsisoqassatillugu.

Provstinik atorfinitsitsinermi suleriaaserineqartoq

§ 26j. § 26k malillugu oqaaseqaammik tunniussisoqarnissaa pitinnagu sapinngisamik biskoppip imaluunniit provstip biskoppip piginnaatitaata aamma ilagiit sinniisaanni ilaasortat qinikkat akornanni qinnuteqaatinik ilisimatitsiffusumik ataatsimiittoqassaaq. Ataatsimiinnissaq qinnuteqarfissamut piffissaliussap kinguninnguutigut biskoppimit aalajangerneqassaaq biskoppimillu provstimilluunniit biskoppimit piginnaatinneqartumit aquneqassalluni. Ilagiit sinniisaannit ataatsimit arlalinnilluunniit qinnuiginnittoqareerneratigut imaluunniit tamanna biskoppimit kissaatigineqarpat biskoppip ilagiillu sinniisaasa akornanni ilisimatitsiffusumik allamik ataatsimiittoqassaaq.

Imm. 2. Ilisimatitsiffusumik ataatsimiinnermut imm. 1-imi taaneqartumut piffissaliussanut periusissanullu malittarisassanik Naalakkersuisut aalajangersaasinnaapput.

§ 26k. Provsteqarfimmi ilagiit sinniisaat qinikkat provsteqarfimmi provstitut imaluunniit domprovstitut atorfinnut inuttaqanngitsunut atorfinitsitsinissaq pillugu oqaaseqaateqassapput. Sapinngisamik biskoppip ilisimatitsiffusumik ataatsimiittitsinerata kinguninngua ilisimatitsiffusumik ataatsimiittoqassaaq.

Imm. 2. Biskoppi sapinngisamik qinnuteqartunik pingasunik pingaarnersiorlugit tulleriiaarneqartunik inassuteqassaaq. Biskoppip qinnuteqaatit ilagiit sinniisaasa oqaaseqaataannik ilallugit namminerlu inassuteqaanni ilanngullugu Naalakkersuisunut nassuitissavai.

§ 26l. Naalakkersuisut aalajangissavaat provstitut imaluunniit domprovstitut atorfimmut kina atorfinitsinneqassanersoq. Qinnuteqartoq biskoppip inassuteqaataanut ilanngunneqanngitsoq atorfinitsinneqarsinnaanngilaq biskoppi oqaaseqaateqartinnagu.

Imm. 2. Provsti palaseqarfimmi provsteqarfiup allaffiata inissisimaffiani najugaqarlunilu sulissaaq.

Kalaallit Nunaanni ilagiit ataanni ilagiinni sulisut allaffeqarfinnilu sulisut qassiunissaat kiisalu atorfiit ilaannut atorfinitsitsinissamut oqartussaasut

§ 26m. Biskoppi Naalakkersuisut isumaqatiginiareerlugit Kalaallit Nunaanni ilagiit ataanni ilagiinni sulisunut allaffeqarfinnilu sulisunut atorfiit pilersinnissaat atorunnaarsinnissaallu pillugit aalajangersakkanik aalajangiissaaq.

Imm. 2. Biskoppip, palasimik atuagarsuarnik allattuisumik ilagiillu sinniisaannik tusarniaareernerup kingorna, ajoqinik organistinillu atorfinitsitsinissamut soraarsitsinissamullu provstit piginnaatissinnaavai.

Imm. 3. Biskoppip, palasimik atuagarsuarnik allattuisumik ilagiillu sinniisaannik tusarniaareernerup kingorna, oqaluffinni ikiortinut, soorlu pedelit, eqqiaasut il.il., atorfinitsitsinissamut soraarsitsinissamullu provstit piginnaatissinnaavai.

Imm. 4. Provsteqarfinni palaseqarfinnilu allaffinni allaffissornikkut sulisunik atorfinitsitsinissamut soraarsitsinissamullu provstit biskoppip piginnaatissinnaavai.

Kapitali 8

Akiliutinik akiliisitsisarneq

§ 26n. Atermik allanngortitsiniarluni kalerriuteqarnermi tamatigut akiliuteqartoqartassaaq.

Imm. 2. Atermik allanngortitsineq akuerineqartoq atermik allanngortitsinermut uppernarsaammik aamma

inunngornermut/kuisinnermut uppersarsaammik imaluunniit inunngornermut/atserneqarnermut uppersarsaammik uppersarsarneqassaaq. Uppersarsaammik taamaattumik tunniussinnermi immikkut ittumik akiliuteqartoqassanngilaq.

Imm. 3. Ilagiit oqartussaasulluunniit allat aqutigalugit atermik allanngortitsinerup kingunerisaanik uppersarsaatinik allanik tunniussinnermi tunniusseqqinnermituulli akiliummik akiliuteqartitsisoqassaaq, tak. § 26o.

§ 26o. Atuagarsuit imarisaat aqutigalugit uppersarsaammik tunniusseqqinnermi akiliutigineqartussat ukuupput:

- a) Inunngornermut/kuisinnermut uppersarsaat
- b) Inunngornermut/atserneqarnermut uppersarsaat
- c) Inunngornermut uppersarsaat
- d) Katinnermut uppersarsaat
- e) Toqusumik nalunaarut

§ 26p. Oqaatsit marluiit atorlugit, kalaallisut/tuluttut, atuagarsuit imarisaat aqutigalugit uppersarsaammik tunniussinnermi akiliuteqartoqartassaaq.

§ 26q. Oqartussat aningaasartuutaannut matussusiinissamut atorneqartussanut akiliutigineqartut akilersinnissaannut akiliutillu annertussusissaannut malittarisassat sukumiinerusut aalajangersarnissaannut Naalakkersuisut piginnaatinneqarput, tak. §§ 26n – 26p.“
Kapitalit 7 maanna aamma 8 matuma kingorna imaalissaput kapitali 9 aamma 10.

12. § 28, imm. 3 imatut oqaasertalerneqassaaq:

”Imm. 3. Biskoppip aalajangigai aalajangiinnermut sapaatip akunneri 4-at qaangiutsinnagit Naalakkersuisunut naammagittaalliutigineqarsinnaapput. Aalajangiinerit annerusumik upperisarsiornermut tunngassuteqartut taamaallaat misilinneqassapput inatsisitigut tunngavinnut attuumassuteqarpata.”

§ 2

Imm. 1 Inatsisartut inatsisaat ulloq 1. januar 2014 atuutilissaaq. Peqatigisaanik Ilagiinni atorfinitsitsisarnerit pillugit Inatsisartut peqqussutaat nr. 8, 30. oktober 1998-imeersoq, atuukkunnaarsinneqarput.

Imm. 2. Ilagiinni atorfinitsitsisarnerit pillugit Inatsisartut peqqussutaat nr. 8, 30. oktober 1998-meersoq naapertorlugu malittarisassat aalajangersagaasut piunnartinneqartulluunniit atorunnaarsinneqarnertik imaluunniit Inatsisartut Inatsisaat manna allatigulluunniit inatsisit naapertorlugit aalajangersagaasunit taarserneqarnertik tikillugu atuutissapput, kisiannili Ilagiinni ikiortit atorfinitsinneqartarnerat pillugu Namminersornerullutik Oqartussat nalunaarutaat nr. 39, 29. december 1998-imeersoq atuukkunnaarsinneqarpoq.

Namminersorlutik Oqartussat, 29. november 2013

Aleqa Hammond

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut